

5. gr.

Fé veðdeildarflokksins má lána gegn veði í fasteignum bænda. Lánsfjárhæðin má eigi vera hærri en svo, að hún ásamt áhvilandi skuldum við veðdeild Búnaðarbanka og Stofnlánadeild landbúnaðarins, fari ekki fram úr 60% af matsverði veðsins. Lánstíminn skal vera allt að 15 árum.

Ársvextir lána skulu vera 9%, þar í innifalið ½% kostnaðartillag til varasjóðs. Lánin eru útborguð í bankavaxtabréfum, sbr. 1. gr.

6. gr.

Að öðru leyti gilda almenn ákvæði laga nr. 115, 7. nóv. 1941 um Búnaðarbanka Íslands, III. kafli 13. til 30. gr. og fyrirmæli um veðdeild bankans frá 30 apríl 1930.

Reglugerð þessi er sett samkvæmt lögum nr. 115, 7. nóv. 1941 um Búnaðarbanka Íslands, og öðlast þegar gildi.

Landbúnaðarráðuneytið, 30. júlí 1973.

Halldór E. Sigurðsson.

Þorv. K. Þorsteinsson.

S A M Þ Y K K T

fyrir **Veidifélag Krossár, Bitrufirði.**

1. gr.

Félagið heitir Veidifélag Krossár í Bitrufirði, Strandasýslu. Heimili þess og varnarþing er Óspakseyrarhr., Strandasýslu.

2. gr.

Félagið nær til allra jarða, sem land eiga að Krossá, en þar eru Óspakseyri, Hvítahlíð, Gröf, Árdalur, Einfættingil.

3. gr.

Verkefni félagsins er að viðhalda góðri fiskgengd á félagssvæðinu, og að leigja það til stangarveiði. Félagið tekur til allrar veiði á félagssvæðinu.

4. gr.

Stjórn félagsins skipa þrír menn, formaður og tveir meðstjórnendur. Skulu þeir kosnir á aðalfundi til þriggja ára í senn. Ganga þeir úr stjórninni á víxl þannig, að formaður gengur út eftir eitt ár, annar meðstjórnandinn eftir tvö ár, og hinn eftir þrjú ár, og helzt svo sama röð áfram. Enginn atkvæðisbær félagsmaður getur skor-
azt undan endurkosningu, nema sérstök forföll hamli, eða að hann hafi verið í stjórn í þrjú ár. Kjósa skal tvo varamenn og tvo endurskoðendur til tveggja ára í senn, þannig að annar varamaðurinn og annar endurskoðandinn gangi út annað árið, og hinir hitt árið.

5. gr.

Stjórnin hefur á hendi allar framkvæmdir félagsins milli aðalfunda. Hún fær menn sér til aðstoðar við þau störf í þágu félagsins, sem vinna þarf á hverjum tíma, og semur við þá um þóknun fyrir. Formaður er fulltrúi félagsins út á við og hefur yfirumsjón með öllum störfum félagsins og fjárreiðum.

Óheimilt er öllum að veiða á félagssvæðinu, nema með sérstöku skriflegu leyfi félagsstjórnarinnar. Í leyfinu skal tekið fram um veiðitíma og veiðitæki, og með hvaða kjörum leyfið er veitt.

6. gr.

Aðalfund skal halda í júlí/ágústmánuði ár hvert. Á aðalfundi skýrir stjórnin frá störfum félagsins á liðnu starfsári og leggur fram tillögur um starfsemi þess á næsta ári. Þá skal hún leggja fram endurskoðaða reikninga félagsins og úrskurðar fundurinn um þá.

7. gr.

Reikningsár félagsins er almanaksárið. Stjórninni ber að færa reikningana í gerðabók, sem henni er skylt að halda, svo og samþykktir félagsins, félagaskrá, arðskrá, fundargerðir og bréf.

8. gr.

Arði af sameiginlegri veiði skal skipt niður á félagsmenn samkvæmt arðskrá. Félagsmenn greiði gjöld til félagsins í sömu hlutföllum og þeir taka arð.

9. gr.

Brot á samþykkt þessari varðar sektum samkvæmt XVI. kafla laga nr. 76/1970 um lax- og silungsveiði.

Samþykkt þessi staðfestist samkvæmt lögum nr. 76. 25. júní 1970, um lax- og silungsveiði, og birtist til eftirbreytni öllum þeim, sem hlut eiga að máli.

Landbúnaðarráðuneytið, 30. júlí 1973.

Halldór E. Sigurðsson.

Þorv. K. Þorsteinsson.

Stjórnarráðsbréf til biskupsins yfir Íslandi um nýja kirkjusókn í Breiðholtsprestakalli.

Með skírskotun til bréfs yðar, háæruverðugi herra, dags. 2. apríl sl., svo og síðari viðræðna varðandi tilmæli í Fella- og Hólahverfum, er fylgja Breiðholtsprestakalli samkvæmt auglýsingu nr. 74 29. marz 1972, um að stofna sérstaka sókn í þessum hverfum, sem markast af Höfðabakka að vestan, Breiðholtsbraut og línu í Elliðaár að sunnan og austan, og síðan Elliðaám að austan og norðan, tekur ráðuneytið fram, með vísun til tillagna yðar og safnaðarráðs Reykjavíkurprófastsdæmis, sbr. 1. gr. XV og 2. gr. laga nr. 35 1970, að það samþykkir, að stofnuð skuli nú þegar sérstök sókn í umræddu hverfi, sem nefnist Fella- og Hólasókn. Sóknar-gjöld fyrir árið 1973 innheimtast með tilliti til stofnunar hinnar nýju sóknar.

Dóms- og kirkjumálaráðuneytið, 30. júlí 1973.

Ólafur Jóhannesson.

Baldur Möller.